

Meeqqat illersuisuat aamma Meeqqat pillugit Siunnersuisoqatigiit pillugit Inatsisartut inatsisaata allangortinneqarnera pillugu Inatsisartut inatsisaat nr. 27, 28. november 2019-imeersoq

(Meeqqat illersuisuata aamma Meeqqat pillugit Siunnersuisoqatigiit ilaasortaasa piffissamik toqqagaaffiannik allanngineq)

§ 1

Meeqqat illersuisuat aamma Meeqqat pillugit Siunnersuisoqatigiit pillugit Inatsisartut inatsisaanni nr. 11, 22. november 2011-meersumi tulluuttut allangortinneqarput:

1. § 4, *imm.* 2 imatut oqaasertalerneqassaaq:

” *Imm.* 2. Meeqqat illersuisuat ukiunut sisamanut toqqarneqartassaaq. Toqqaqinnekarsinnaavoq.”

2. § 4, *imm.* 3 imatut oqaasertalerneqassaaq:

” *Imm.* 3. Meeqqat illersuisuat piffissami toqqaanermi Naalakkersuisunit tunuartinnekarsinnaavoq, tamatumunnga pissutaasinnaasoq ataaseq arlallilluunniit kinguliini taaneqartut naammassineqarsimappata:

1) Inatsisartut inatsisaat manna malillugu Meeqqat illersuisuata suliassaasa suliarineqarnerat Meeqqat illersuisuannit annertuumik sumiginnarneqarsimappata.

2) Meeqqat illersuisuat iliuuseqarsimappat Meeqqat illersuisuata Inatsisartut inatsisaannut tunngatillugu suliassaasa Meeqqat illersuisuannit isumannaatsumik suliarineqarnissaannik nalorninartitsilersumik.

3) Meeqqat illersuisuat soraartussatut Meeqqat pillugit Siunnersuisoqatigiit ilaasortaannit ikinnerpaamik tallimanit innersuussutigineqartassaaq aammalu Meeqqat illersuisuata soraarnissaanut Naalakkersuisunit pissutsinik sukumiisumik misissuisoqareerneritigut. Innersuussineq allakkatiguussaaq tunngavilersugaallunilu.”

3. § 5, *imm.* 3 ima oqaasertalerneqassaaq:

” *Imm.* 3. Ilaasortat piffissamut ukiunut sisamanut toqqarneqartassapput, taamaalilluni ilaasortat nutaat pingasut ukiut marlukkaarlugit toqqarneqartassallutik. Ilaasortat nutaat toqqarneqarnissaata tungaanut ilaasortaareersut atuutissapput. Ataasiarluni toqqagaqqittoqarsinnaavoq.”

4. § 7 imatut oqaasertalerneqassaaq:

“ § 7. Meeqqat pillugit Siunnersuisoqatigiinnut ilaasortaq piffissami toqqaanermi Naalakkersuisunit tunuartinnekarsinnaavoq, tamatumunnga pissutaasinnaasoq ataaseq arlallilluunniit kinguliini taaneqartut naammassineqarsimappata:

1) Inatsisartut inatsisaat manna malillugu Meeqqat pillugit Siunnersuisoqatigiinnut ilaasortap suliassani annertuumik sumiginnarsimappagit.

- 2) Meeqqat pillugit Siunnersuisoqatigiinnut ilaasortaq iliuseqarsimappat ilaasortap Inatsisartut inatsisaannut tunngatillugu suliassaminik isumannaatsumik suliarinnissinnaaneramik nalorninartitsilersumik.
- 3) Meeqqat pillugit Siunnersuisoqatigiinnut ilaasortaq soraartussatut Meeqqat pillugit Siunnersuisoqatigiinnut ilaasortaannit arfinilinnit innersuussutigineqartassaaq aammalu Meeqqat pillugit Siunnersuisoqatigiinnut ilaasortap soraarnissaanut Naalakkersuisunit pissutsinik sukumiisumik misissuisoqareerneritigut. Innersuussineq allakkatiguussaaq tunngavilersugaallunilu.”

§ 2

Inatsisartut inatsisaat ulloq 1. januaari 2020-mi atuutilissaaq. Meeqqat illersuisuata toqqagaaneranut imaluunniit toqqagaaqqinneranut aammalu Meeqqat pillugit Siunnersuisoqatigiinnut ilaasortamik toqqaanermut imaluunniit toqqagaaqqinnerannut § 1, nr. 1 aamma 3, Inatsisartut inatsisaata atuutilerfiata kingorna atuuttuulissaaq, taamaattorli tak. imm. 2.

Imm. 2. Meeqqat illersuisuat aamma Meeqqat pillugit Siunnersuisoqatigiit pillugit Inatsisartut inatsisaanni § 6, imm. 2 malillugu Meeqqat pillugit Siunnersuisoqatigiinnut ilaasortamik toqqaaneq siullermeersumik pissaaq, Inatsisartut inatsisaata atuutilernerata kingorna, toqqagaaneq taamaallaat ukiuni marlunni atuuffiusussaaq.

Namminersorlutik Oqartussat, ulloq 28. november 2019



Kim Kielsen